

四庫全書

集部

欽定四庫全書

集部

純白齋類稿

目錄
卷一至

詳校官編修_臣翟槐

中書_臣劉源溥覆勘

總校官進士_臣繆琪

校對官中書_臣王家賓

謄錄監生_臣朱學濂

欽定四庫全書

集部五

純白齋類稿目錄

別集類四
元

卷一

賦

卷二

五言古體

卷三

五言古體

卷四

五言古體

卷五

七言古體

卷六

七言古體

卷七

五言律詩

卷八

七言律詩

卷九

七言律詩

卷十

七言律詩

卷十一

七言律詩

卷十二

五言排律

卷十三

五言絕句

六言絕句

卷十四

七言絕句

卷十五

七言絕句

卷十六

七言絕句

卷十七

七言絕句

卷十八

銘

頌

傳

卷十九

贊

跋

碑銘

卷二十

序

記

臣等謹案純白齋類稿二十卷元胡助撰助字履信一字古愚婺之東陽人始舉茂才為建康路儒學錄歷美化書院山長溫州路儒學教授用薦再為翰林國史院編修官秩滿授承信郎太常博士致仕歸時至正五年也自訂著述共三十卷曰純白齋類稿歷年既久殘缺失次今所存賦一卷詩十六卷雜文三卷凡二十卷仍名類稿蓋明正德中其六

世孫淮所重編者助與虞集貢奎蘇天爵諸人結契甚密而吳澄尤為賞激嘗謂所作如春蘭茁芽夏竹含箨露滋雨洗之餘馥馥幽媚娟娟淨好今觀其詩文不無稍近於平易而神韻清雋格度嚴整猶能不失古意在元末實足自成一家助別著鑒坡小錄升學祭器文有鄧文原吳澄跋語今文並無之蓋已
在亡失卷中矣乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

純白齋類稿卷一

元 胡助 撰

古賦

西峴山賦

并序

西峴者東陽望山也稽縣誌前修詩雅之什頗多顧
未有為之賦者豈其不登載歟助操觚牘有年伏居
里下輒采其事以寓微意焉其詞曰

二儀之氣凝而為山陽鍾秀麗陰結嶢巖君尊者五嶽

而天下之山皆臣屬雖小邦與下國亦必有望居其間
是故天台雁蕩匡廬禹穴專美一方千古誇說世蓋有
實同而名異或形容之未至得不貽林澗愧者乎粵稽
東陽之壤實肇建於孫吳西峴雄峙其南今憑重鎮於
邑都東峰嵬然而對拱兮儼大賓之欲趨蒸嵐洪洞疊
巘崎嶇崇岡衆皴修澗縈紆鱗然若積呀然若虛蜿蜒
若動駭然若逋飛瀑澎湃鳴籟喧呼深林灌薄蒼鬱蔽
虧坡陀相屬連綿委蛇朝以畫溪表以石笋傍聯涵碧

下瞰市井甑山峩峩雲洞隱隱前揖摘星之峰後控風
門之嶺數百千仞莫測其高數十百里盤踞周遭攀緣
登陟蹭蹬疲勞踐莓苔之蒼石爭線路於猿猱灑松風
於絕壑驚翻天之海濤白雲生於步履丹霞拂於巾袍
至若懸崖峭壁萬木龍從凌霄翳曜駭綠紛紅太空倏
變幻施神功斷虹殘照烟霧朦朧或青或紫若淡若濃
詭態異狀模寫難窮爾乃秀鍾於物則有靈藥芳茗珍蔬
果木橡栗鴟蹲黃精杞菊瓜勝東陵酒妙天下鳥獸連

山魚鼈盈沼可釣可羅可茹可飽秀鍾於人則有名公
巨卿忠臣孝子文學英俊不可勝數元興詞藻為唐儒
紳二馮競爽高蹈韓門昭諫舊隱墨沼猶存孝哉斯許
正節忠魂又若南渡以後喬葛馬李官顯於朝望尊閭
里振拓名園崢嶸甲第曾幾何時荆榛滿地嗟夫終南
之居住則佳矣莫逃捷徑之譏鍾阜之隱美則美矣不
免山靈之移矧茲山之擬峴始立名以何徵稽故老之
流傳本仲文之遺榮彼晉氏之賊子豈羊公之擬稱惟

戴令之遺愛儼泮宮之碑銘俾易之曰戴岷斯善惡之
昭明慨茂陵之傑作破千載之昏冥有若空山石壁泉
流琮琤非絲非竹節奏自成揭名水樂一洗洼淫坡公
寄詠高視古今又有龍湫碧澗曰不老泉飲之不竭莫
窮其源昔人之登臨者何限其遺跡蕪沒於荒烟若唐
宋名流之鐫刻亦皆燒侵土蝕而莫完矣孰與我居泉
上而老焉乃為招隱之歌曰振衣高岡兮水樂潺湲磬
裏入海兮遺音空山秋風嫋嫋兮桂可攀騫鸞翳鳳兮

扣雲關招赤壁之謫仙兮弄明月以俱還又歌曰薇荒
兮芝老四海清兮起商皓蕙帳空兮曉寒樹蓊蓊兮雲
漫漫疇能侶猿鶴兮佩明月於空山

秀野園賦并序

僕營小圃久矣顧以奔走南北遂就荒蕪丁巳秋來
歸日涉始一構茅亭今春草木生意蔚然而僕以病
廢葺理嗟人事之易違慨園池之難就故為賦以紀
其實云

余觀夫古人之遊息兮擅山水之清佳築亭館以臨水
兮騁觴詠之逸懷或窮達之不齊兮固性情之匪異澄
心源之鏡淨兮乃有得於真意矧愚戇之所趨兮與流
俗而背馳既膏肓於簡牘兮復寄興於園池嘗引流而
種樹兮始茅亭之云構慨江湖之放浪兮至今十年其
未就賦彭澤之歸兮尚松菊之如舊竹瀟瀟而戛玉兮
柏凜凜其歲寒輦太湖之蒼石兮幸故人之破慳餐野
梅之浮香兮植小山之叢桂樹忘憂之萱草兮藝盈畹

之蘭蕙芳桃李之成蹊兮開步障之紅雲美葵榴之當
晝兮水華浮而含醺伊四時之花木兮聊封植其一二
客與我而同遊兮惟飲酒而琢句嗟數畝之閒壤兮在
夫人之經營步石徑之幽曲兮與魚鳥以忘情後有臺
之孤峙兮環溪山之秀麗可登覽以自娛兮吐胸中之
奇氣揭秀野以為名兮取獨樂之詩篇豈專專於學圃
兮庶幾景仰夫昔賢若有人而清嘯兮實同得於斯樂
時杖履之往還兮慰索居之牢落彼貴盛之名園兮在

往昔其焉窮極勢力之營造兮曾不一瞬而已空惟種
德以為根兮獵文藝而培植敷芳陰之茂密兮綴纍纍
之佳實灑清風於田里兮寧光景之留連諒出處之難
必兮樂吾生之餘年擷畦蔬以侑尊兮蓋惟日而超然

小赤壁賦

并序

延祐六年夏四月望後一夕宋氏子具舟邀予同二
三客遊於小赤壁之下明日既歸乃為之賦其辭曰
小赤壁者蓋美化溪山之勝處也其上則蒼崖巨石其

下寒泓澄碧雲出雨空變化莫測烟霞宵冥風月無極
敷異草之茸茸蔭長松之落落蟠老蛟之蜿蜿鳴幽禽
之喋喋蹲釣磯於中流隱丹竈於深穴遺笙鶴之清音
留轂鯨之巨跡故老相傳以為劉晨修煉之室是蓋異
人之窟宅者矣繫後來之好事慕周郎之赤壁庶風流
之可追故小字之名錫矧縉雲之古邑實山水之奧區
屬觀遊之清麗多仙佛之所都直蒼山之律率連左庫
之膏腴惟昔流風之未泯至今冠帶兮于于爾乃孟夏

既望林巒蔚如爰有儒生具舟邀胡子與客遨遊於其
下浮雲四映明月東升風行水上穆然而清淨影涵虛
魚鳥不驚玻璃萬頃流光熒熒於是舉酒相命客按商
聲而歌之歌曰周郎兮功成山川鬱兮炳精英遷客兮
興懷橫大江兮擊空明兩賦出兮洗千古水與月兮含
餘情胡子乃扣舷而和之曰劉郎兮登仙溪壑峭兮神
清寒英雄兮安在邀高風兮山川間同赤壁兮誰小大
化白鶴兮遲來還歌罷酒酣移舟碧潭我欲燃犀下照

幽潛戒取樂之或過懼鬼物之弗堪客仰而望俯而歎
曰吾聞峴首非高因羊公而始著山陰匪竒托右軍而
永譽嗟惟此山峻美實異何聲聞之弗馳殆名世之難
遇彼何澹之俗書非老坡之妙語故山川之顯晦不同
與胡子忻然而笑曰客何知之晚也豈惟山川人事固
然世有乘時微利而成名亦有立志勵行而終蕪沒者
矣倘是山之居通邑曾何患聲聞之不大出耶今我與
子遺棄憂慮終夕酣笑徜徉於此惟其真樂之是適豈

虛名之足取况夫太平盛際文治方興窮書林之騁逐
肆藝苑之憑陵嗽芳潤而養浩將待賈而揚庭期接武
於先達庶無愧於山靈

秋堂賦

有美君子築室字秋左右書史於焉藏修輪奐之美兮
不侈不陋軒窓之曠兮既固既周亶尚友於千載匪專
美於一丘方其殘暑未退火雲在霄忽涼風之徐動開
六合之新甍爽氣浮於榻几商聲振乎枚條或褰裳而

拄笏發孤詠於風騷爾乃金井寒兮踈桐畫欄香兮桂
樹室幽幽兮蟲鳴窻罔罔兮蟾吐水鏡淨兮潦收百草
哀兮墜露於是主人命童奴却桃李延毛穎進陶泓修
臨池之故事覺逸興之橫生貌猗猗之玄象肖磊磊之
塊形琴七絃兮古操酒一瓢兮閒情客或過而笑曰異
哉主人之字夫堂也其將照昌黎公之短檠乎其將賦
歐陽子之秋聲乎吾嘗北走燕趙東過齊魯而南遊吳
越矣知秋之為狀者宜莫余若也嘗試為主人言之主

人亦嘗試聽之其氣至清其容至明人稟之而神秀物
受之而形成是蓋收兩儀之妙運而擅一元之利貞者
也若夫洞庭兮波生吳江兮楓落夜雨兮孤舟殘陽兮
高閣天空兮凌厲鴻飛兮寥廓悵久別之音稀顧山川
之非昨歎客子之無依感騷人之有作又觚棱出兮宮
樹曉角弓鳴兮沙場陰泣藏笥之紈扇悲出塞之胡琴
屬刑官之進用雖貴盛而驚心復有辭家千里去國十
年杯殘炙冷衣弊履穿慨功名之未就傷歲月其脫弦

恨遷謫之已久望君門兮九天其或隨時見幾守道知足思千里之萼鱸懷三徑之松菊駕西風而言歸蓋超乎榮辱者也是可以知江湖之秋矣若斯堂之秋則又有說焉今夫人生千載之下而知千載之上者莫備於書一身稊米之微而參天地之大者莫貴於儒方庭戶之清肅宜簡編之卷舒覽萬物之成遂添滿懷之瀟灑觀聖人之筆削示嚴威於亘古窮則秋歸於一堂達則秋行於天下方今郡國賓興斯文增重凡舍毫持牘之

士孰不自陳而願用矧卓犖之奇才兮切獨悲此蕭索
吾恐將有事於四方兮又烏能專秋堂之獨樂也主人
矍然謝曰子姑置四方之事吾將與子逍遙於斯堂之
上以遊乎顥氣之始勿敗佳致客曰唯唯

圍棋賦

閒居適意惟棋甚美子圓局方法乎天地分黑白之兩
奩妙動靜而為智斯乃神仙之用心蓋亦聖賢之游藝
若夫剝琢琢琮琤琮琤丁丁寂無人語惟聞子聲潛斡化

機於經國默運方略於制兵初磊落以布勢漸縱橫而見形察形勢之向背識去就之重輕顧雁行之斷續審象眼之虛實守邊角之無虞憂腹心之有疾將欲取而與之勿貪得而固必至於一著爭先詎宜妄下觀勝負之善籌係取數之多寡始自固以迫人貴知權而御詐投間隙之造次據要害而整暇若臨敵以見幾實千變而萬化稽前古之戰爭殊可明於鑑戒嘗試評其一二良以小而喻大或恃強而致敗或徼倖而有成喪苻堅

之百萬天陰相夫衛青或用奇而不濟或得志而橫行
師蜀道之再出火赤壁而飛英或詭計以設險或乘危
而制勝縊樹下之龐涓嚴背水之號令或百勝而一敗
或屢危而僅存聞楚歌之四面成劉備之三分或輕奮
而深入或重圍之無援傷覆車之李陵慨忠烈之巡遠
或孤城之堅守或長驅而席捲猶即墨之不下平六國
而制郡縣諒深謀之莫盡矧雅度之難能喜成功而折
屐臨死生而不驚復有勢均力敵無間彼此何虧何成

不生不死兩忘所爭揖讓是似至若花陰兮深院竹色
兮虛庭青燈兮夜雨愛日兮窓明敵手相逢時對一枰
高懷逸韻實倍常情輒隨機而應變非苦心而勞思驚
脫兔於楚女笑虎穴之得子爾乃固深根於商嶺寄白
日於柯邊勝忻然而敗亦喜庶足以順神而保年

純白齋類稿卷一

欽定四庫全書

純白齋類稿卷二

元 胡助 撰

五言古體

京華雜興詩二十首

有引

余待選吏部貧不能歸塵衣垢面憧憧往來蓋亦莫
自知也於是以前所聞所見感觸於中者輒形為詩
五言五韻凡二十章題之曰京華雜興詩率然而作
曾無律呂之次譬如候蟲之鳴不能自己姑亦偶寓

其一二微意焉他日南歸將以誇示田夫野老俾畧
知京華之風景爾

其一

朔方古燕國今為帝王都建元大一統萬世恢寵摹聲
教日以遠巨麗昔所無梯航極山海寶玉殫貢輸冠裳
集詭異親見王會圖

其二

通門十有二萬雉雄都城崇天壯宮闕朝賀臨大明禮

樂參今古郊廟薦德馨中書總庶務比屋皆公卿時有
能賦者揚揚頌休聲

其三

兩院最文館優游玉堂仙扶杖會朝議秉筆光史筵辟
雍訓胄子濟濟登才賢人時正厯象星含儀渾天東觀
圖書府圭璧何爛然

其四

聖心資啓沃曠典開經筵大臣領其職諸儒進翩翩講

成堯舜道庶使皇風宣恭惟帝王學繼統垂萬千方將
耀稽古寵遇光屬聯

其五

漕渠越千古海運連萬艘百靈咸受職長風駕洪流都
城仰陳腐日糴太倉籌本根實儲蓄經費無沉浮巍巍
廟堂上必先天下憂

其六

嗟彼西方教崇盛何煒煌至尊猶弟子奴隸視侯王禪

衣爛雲錦走馬趨明光民賦耗太牢永言奉祈禳寂寂
東家老絃歌守其常

其七

京師聚人物固足廣見聞經術宗濂洛詞章軼卿雲致
理三代上漢唐何足云銓衡有定法刑憲無深文端能
守官戒豈羞獻曝片

其八

我我十石鼓列置太學陞懇懇韓公志厥今乃見之文

明日以盛好古如渴飢千載一俯仰陳迹何容窺荒城
長春草寂寂金臺基

其九

翠華慰民望時暑將北巡牛羊及騾馬日過千百羣廬
巖周宿衛萬騎若屯雲擅房貯窈窕玉食羅羶葷珍纓
飾駝象鈴韻遙相聞

其十

水深土良厚物產宜碩豐瓜果饒夏實棗梨絢秋紅槐

陰蔽門巷喬木多古風廣收壓湮酪皮羽丘山崇一葦
可萬里河流誠會通

其十一

君子貴名爵藏器將俟時難進每由道晚成寧覺遲豈
無英俊士流落日以卑亦有庸瑣才附驥千里馳何用
多感慨古人亦如斯

其十二

天衢肆寬廣九軌可竝馳晴雷震奔軸輕蓋常披披長

風一飄蕩塵波漲天飛憧憧有玄相貿貿無素衣亦擬
頌功德何如歌式微

其十三

修綆汲深井劬勞出甘泉皮服禦寒冽土床煖冬眠寓
客延歲月區區計陞遷都城百萬戶喪車日喧闐洪鐘
發晨省達者斯歸全

其十四

久安誠富庶豪華恣奢淫優坊飾文繡酒館書填金市

中商賈集萬貨列名琛馳騁貴遊子車塵如海深翩翩
江南士駭目還驚心

其十五

富饌有臭肉貧衣無完襟販夫逐微末泥巷穿幽深負
戴日呼咷百種聞異音馬流爭決拾曝藏比乾薪苦樂
諒習慣貧富何由均

其十六

北風吹海子徹底成堅冰冲冲誕收鑿往來堪騎乘春

陽一以轉凍解聞裂聲依然拂堤柳綠波照人明彷彿
江南岼遊冶多歡情

其十七

一自書雲後家家成蟄居塞向紙為戶啓閉猶卷舒風
塵不能入盎然春意如石火永終日飲食與之俱標圖
計陽盛九九寒消除

其十八

我來寓京邑興懷舊遊遨春風有遺恨不見玄都桃世

事若雲變矧茲居市朝物理忌滿盛榮華易蕭條布衣
抱玉雪寧羨宮錦袍

其十九

好名與好利清濁無異宜譬如尚經術以及工文辭同
此慕光顯胡為分等夷捷哉終南徑邈矣西山薇車馬
紅塵際滔滔良可悲

其二十

世治化由北風氣今咸通生長太平日千載能幾逢又

幸冠軍甫文思發泉蒙微吟識百一浩大能何窮他年
老田野尚想京華風

上京紀行詩七首

同呂仲實宿城外早行

我行得良友夜宿建德門晨征帶殘雨華星綴雲陰局
轡乘羸馬沿途共笑言兩京隔千里氣候殊寒暄聲利
汨清思山川發雄文平生所未到扈蹕敢辭煩愧予鴈
鷺姿亦復陪鸞鵠歷歷紀瑰偉一見勝百聞茲遊償夙

願庶用歸田園

昌平

經過昌平縣實惟劉子鄉當時直言策至今有耿光功
名真瑣瑣氣節橫八荒斯人寧復見閱世徒慨慷奉祠
表諫議化俗崇賢良賊臣偶同里遺臭亦難忘嚴程懼
稽緩古跡嗟莫詳揮鞭事前邁居庸翠蒼蒼

居庸關

居庸古關塞我老今見之天險限南北亂石如城陴朝

光映蒼翠征袖涼颼颼澗谷四十里崖巖爭獻奇禽鳥
鳴相和草木蔚華滋佛廬架巖上疏泉滙清池民居亦
棋布機磴臨山陞清幽入行李緩策遂忘疲黃屋年年
度深仁育黔黎從官多名儒山石徧題詩伊余備史屬
斐然愧文辭矧茲中興運歌誦職所宜皇靈符厚德豈
曰恃險巖

懷來道中

百千僦一馬日行百餘里未明即戒途將中輒至止人

困馬思睡馬疲徒用箠驅馳失情性老病侵髮齒可憐
勞鞅掌豈知固如是徑行古關塞形勝那盡紀荒落久
寧靜富庶或成市清晨過懷來沙草風烟美想當用武
時滿野控弓矢白塔遠招人揮鞭渡流水

李老谷

人言桑乾北六月少炎熱我行李老谷流汗還病暈疲
馬鞭不進况復礙車轍翠巖石幽幽久晴澗水竭牛羊
放山椒穹廬補林缺投宿山店小子規夜啼血南歸空

有懷聞之愧剛決顧方上灤陽玉堂看秋月更闌不成
寐聲聲山竹裂期是明年春相聞在吳越

赤城

山石似丹堊赤城因得名土異產靈瑞永宜奉天明市
廛集商賈有驛通上京觸熱此經過忽看風雨生平原
走潢潦河流浩新聲斯湏即開霽燦爛雲霞橫

鰲峰

乾坤氣磅礴山石鍾奇形鰲峰纔數尺濯秀何亭亭勢

欲負厚地岌若霄漢凌一峰更旁聳玲瓏穴虛明青膚
縈白障微扣宣金聲中涵太湖潤瑰偉專上京想當初
鑿時山鬼泣以驚置之玉堂前幾閱瀛洲登年來對閣
老岷峨眼中青雨漬生古色月寒見霜稜摩挲助文思
一揮九制成諒勿憂豪奪長茲托佳名

春日言懷

春寒不見花陰陰生晝暝隱几羣書間神清一甌茗時
光忽川逝撫卷發深省夷齊與盜跖俱得千載永借問

起榮名何如事幽屏偶起看歸雲鳥啼山自靜

落葉吟

一葉飛秋空萬物無好客千葉萬葉脫遊子淚如潑涼
風朝暮吹蹤跡無定時高枝漸稀少何處庇棲鳥

湖上燕集

風吹翠篠長雨過黃梅熟茲時屬清和湖上佳草木水
寬納空明山淨呈新綠張筵俯龜魚盡日醉醺醺劇談
幽鳥驚妙語高僧伏酒酣學楚狂起舞歌躑躅山水趣

不同所得皆自足困眠掃落花洗醉汲寒玉澹然雜紛
華一笑謝羈束明朝還獨來白雲滿空谷

發婺州

扁舟發雙溪春流浩如瀉轉岸失孤城歌枕蘭江下江
雲日千變花雨一時灑翩然午夢回蓬低斟老瓦不暇
惜清景風檣疾於馬快哉千里心誰是同懷者

和桂坡李宅仁甫山園八咏

并小序

僕歸自京師僵卧空山人事殆絕李宅仁甫寄示山

園八咏句清景勝樂意超然高蹈之風蓋可仰也輒
次嚴韻以謝殊愧不工胡助再拜

草臺春意

靈雨從東來積潤漬苔石池塘夢初覺春草連竹色臺
上書帶長臺陰土花碧乾坤總生意幽人固當識

竹逕秋聲

一逕入修竹清風在其間主人時得句擊節書琅玕翩
翩青鳳尾肅肅羣仙環商聲忽吹散日暮碧雲寒

冰壺避暑

清景似冰壺
葛衣風露入六月不知暑
翠筠森玉立
展席俯長流
歌呼羽觴急
探韻及冥搜
醉墨題偏濕

雪嶠尋春

昨夜飛天花
南山白巍巍
樵徑迷行跡
壓折澗底梅
乾坤有春意
先向南枝迴
從此露消息
日日穿屐來

石壇夜月

明月懸中天
萬古秋骨冷
石壇一片雲
挂魄流清炯
良

夜寂無聲露坐不知永想見謫仙人金樽長對影

花嶂夕陽

名花植無數綽有西蜀風一笑却嫣然崇光泛千重日
永春睡足斜暉映深叢絕勝華堂上夜燒銀燭紅

翠屏薇露

葦芳以為屏柔萼敷翠色薇露綴明珠香風豈自滴朝
來濕錦袍持杯聚靈液止渴慰文園怡神躋壽域

土銼茶烟

東白採新茗最宜櫻笋厨土銚烹石泉詩腸沃雲腴輕
烟避孤鶴花暗修竹疎依稀魏處士寫作山居圖

純白齋類稿卷二

欽定四庫全書

純白齋類稿卷三

元 胡助 撰

五言古體

黃樓懷古三首

我懷蘇子瞻昔年守彭城
河決勢方橫四面如海平
晝夜具畚鍤窒罅鑄方塾
傾斯民免為魚安帖無震驚
水退安敢逸相方益經營
曰土能勝水築樓以黃名
至今受其賜燕樂清風生
君看子由賦千載有餘情

我懷蘇子由嘗宿逍遙堂中夜聽風雨對牀如故鄉平生友于樂江海真難忘臨分出苦語愛篤情婉傷長公不忍讀淒然攪中腸人豈無兄弟誰共千載光當時此盤薄德星聚煌煌坐中老文學里人陳履常

我懷陳履常向來有斯人介然修苦節寧畏丞相嗔文章提一律閣筆黃樓賓送遠曠官守不負知己恩正字未溫飽忍凍甘死貧彭城古形勝英雄昔成羣勲業亦何有青史不滿嘖俯仰三嘆息浩浩黃河奔

分義田詩

昔我先君子好義希范公買田踰千畝廩族若萬鍾老
幼無凍餒衣冠樂時雍聲名鄉黨振碑碣文辭豐庶幾
合同姓風俗由茲隆立規具昭列繼志期無窮海波忽
清淺世運迥不同貪汙成一律教化焉能崇利私紛擾
擾賦役迫匆匆遂令吾族子操觚嘗瘠容嗟我生已晚
艱難適相逢甚欲圖永久獨立夫誰從挾私出千變屈
曲心如蓬勢孤事愈謬力弱任匪充復此遇盲宰貪酷

肆彼凶質貸不遑給債負日以穹譬如河決橫莫障狂
流東又似將顛木朽蠹內交攻後生靡從學子弟多頑
童勤勞復誰恤怨謗方忡忡矧能辨名分格暴惟卑恭
骨肉若讐旅愧恥填心胸繫我萬里足偃蹇棲雲松安
得除戶籍惠好思其終探丸議分畝肥瘦均上中計丁
謝廉遜悉力歸耕傭無已出下策有泚虧前功受田念
厥始起廢疇為雄業散稅仍在尚覺遺憂濃吏貲不滿
欲駕說欺盲聾綿延五紀過倏爾一朝空禍福塞翁馬

亡得楚人弓寧不念爾祖壞者非吾宗作詩志慚憤願
獻觀民風

寄柳道傳十首

柳子吾畏友夙昔攄遠志稽古超俗流潛心養浩氣翔
集得時中師資致身貴碌碌嗟不才釣竿老清渭

太學得名師光燄騰冀北晨入誨諸生諒非謀飽食聲
華映朝紳文字垂金石永懷勞夢寐安得生羽翼

憶昨都門別斗柄六移春還家如坐井俯首混俗塵溝

壑憂不免無乃甘賤貧時時登隴畝悵望玉堂人

雲仍魯柳下大雅君獨賢溫粹懷美璞聖道知有傳
曳裾冠東閣歲當官九遷寧念寒郊否相望隔遙天

殘暑忽已退秋風入庭樹有客北首轅因之寓尺素
廣廈談道餘霧窓灑新句幾度雁南來如何無一字

京師聚時彥才美君疇雙文章持憲律夙昔受我降
毫端挾風雨快意驅濤江固宜煥王度衣錦榮鄉邦

博士職訓詁歌誦宣王風周南方願學老我浙水東
切

磋無益友頑鈍命之窮用儒臻至治耕釣萬山中

耿耿抱空懷蒼顏非昔日雲泥異升沉歲月驚飄忽學
省始登進斯文何炳蔚要當配韓公經濟由此出

舊遊憶京國故人多要路金石心不移推轂寧幾遇讀
書牕戶涼朱墨研秋露何期共言笑復恐逼哀暮

文明近日月清夢時見君豈無薦士術顧我耳不聞野
性在丘壑麋鹿真同羣道遠何所寄不堪持白雲

送永康縣尹范成父

縣宰登庸式化行若郵傳近民在平易尚德還古先花
溪范令尹善政居八年庭空長秋草野闢搖春烟黔首
自安業窮山何晏然鄰封亦欣慕願借無由緣能名屬
久任活民旱租蠲代間曾幾見昔人美難專吾宗老文
學秉筆不苟賢侯去方顯達遺愛青瑤鐫

題熊仲岳鍊師雲巢

仙人好樓居故以雲為巢雲行無定止其巢亦飄飄山
中不甯住天上叅翱翔從龍氣綢緼潤澤青林阜終然

載笙鶴歸去嘗蟠桃

孝思堂

純孝心永慕作堂以思親萊衣在篋笥手澤時自陳哀
哉蓼莪篇一誦一沾巾纂纂庭前棗沉沉水下鱗長號
攀松柏瞻彼原草春

喜雨

熱極勢將往屬茲近秋期火雲一以洗風雨來如馳人
心豈不慰萬物皆熙熙連朝成霽霽清坐簷花垂窺我

園中蔬青青秀如芝盛衰有常理貧病何足悲閉門處
窮巷寧憂天下饑新涼入窓戶聊復吟吾詩

饑嘆

靖節饑來時扣門或求食顏公拙生事乞米形翰墨古
人貴真率所向無慚色叔世尚矯偽孰謂微生直我今
坐旅貧官寒不暖席冬去燕之南春向薊之北及此米
如珠囊空無可糴併日營一炊微俸久未得詎敢求諸
人愧乏古之德僮僕生怨尤忍飢長太息思昔同僚友

飛騰多赫奕寧顧涸轍鱗西江水慵激間有知心者虛
談諒何益

送復上人歸越

上人越中舊夙昔叅黃梅諸方證有道一念踰五臺幾
回到京國說法金鑿開邂逅聽談辯從容笑追陪雲山
曉飛錫月波夜浮杯去來本無迹俗子徒驚猜物我俱
幻化乾坤聚飛埃摩泥照濁水真性何遼哉却懷舊所
棲千峯碧崔嵬歸見韓處士無言坐莓苔

賦燹道送蕭存道元帥

漢武開燹道雲南此初程遙遙蜀山碧湛湛瀘水清緬
懷諸葛公深入揚威靈嗟彼古戎俗秉彝均性情世皇
闢土宇六詔通上京邇來或梗化凱獻旋復平有美述
律侯將業文武并論功擢元帥增秩萬里榮威德夙所
著燹人道邊迎益務懷遠略永言垂令名

嚴氏高遠堂

釣臺嚴先生濯足桐江流客星動光采一竿老羊裘高

節世所仰以氏名其州賢者必有後不在公與侯雲仍
歷千載隱居擅林丘築堂志高遠祖風益以修登覽物
色佳白雲為我留羣岫列蒼蒼逝波去悠悠借問雲臺
裔幾家能在不客來勿笑語恐驚沙上鷗

題危太樸雲林隱居圖

窈窕雲林麓青峰三十六飛鳥度南澗流泉出空谷柴
扉守猿鶴苔徑入花竹草堂讀書處中有人如玉神閒
自蕭散山靜更幽獨盤薄意不盡長歌招隱曲

皆山樓

高居結重屋四面皆青山秀色滿虛楹爽氣浮危欄讀
書靜相對不厭終日觀大峰似君子小巒如侍鬟羣岫
見頭角起伏猶龍鸞朝暮呈百態空霏碧窻寒夜猿叫
寂寂春鳥鳴關關連岡紫芝老幾樹松花殘撫卷或休
息曲肱聽潺湲明月來席上白雲宿簷端勝處惟自得
世塵那可干長歌招隱曲窮年以盤桓

柏友亭

新樹庭前柏中含千歲姿蒼蒼春不榮落落冬乃奇吾
聞蜀相廟上有青銅枝君應得其種故能植於斯敬之
若畏友諸葛真吾師

中秋月下小酌

中秋好明月萬里天無雲爭看白玉盤清光滿乾坤京
華有獨客對之酒一樽今月即古月今人非古人百年
幾迴見但悲華髮新我雖不解飲小酌意自真舉杯吸
風露肝膽成冰輪出語驚流俗一洗萬古塵

宿定興有感

清晨發保定風雨何淒淒亭午到白塔晴曦曬秋泥一
飯更馬去擇地穿荒蹊據鞍時傲兀坡坂高復低前宿
定興館解裝日云西昔過踰一紀悵然尋舊題世途諒
多險人事那能齊老我此行畢歸與北山棲

春闈對讀夜坐諸公

南宮試多士作噩歲在酉積雪勝冬寒時維仲春首京
甸供給繁儀曹文物早燈火夜堂深至公鑒妍醜朱衣

頭暗點天門榜懸久主司有歐陽頗識二蘇不我我雙
豸冠執法揮星斗簾外多英俊顧余獨衰朽斯文安敢
與所思在官守寧知當此職再見十年後風簾官燭短
朗誦不停口吻燥沃雲腴眼花却醇酎疲倦閒少休連
牀對佳友得賢致平治化俗歸仁厚上林春色濃麟鳳
見郊藪明朝開鎖院騎馬看花柳

跋實彥卿鹽憲四詠軒

紅藥春風



霞影翻階砌紅芳表餘春向來直蘭省持贈思美人綵
筆發孤詠和風散醴熏宛然調鼎姿歲晏承華勛

蒼松皓月

明月出東城先照蒼松頂冰雪入懷抱軒牕散清影老
龍吟瑟瑟驪珠光炯炯奈此良夜何徘徊衣袂冷

怪石博雲

巖巖太古色岌岌神嶽狀雲霓觸其膚勢凌霄漢上千
年軋蘚文篆籀若可訪注目敬拜之實維丈人行

綠筠擎雪

瓊英濕翠袖珠璣綴琅玕飄飄落飛屑雜佩鳴珊珊此
君有高節正爾逢歲寒玉音清人耳朝朝報平安

賦青門送李侍御惟中

繡衣謫仙人再見西入秦春日長安道驅車過青門觀
風省民俗慨然一咨詢東陵久岑寂瓜地起寒雲故侯
尚安在惟有令名存

溪橋行客圖

招提屏塵跡窈窕蒼山根
樛木覆寒澗小橋通遠村
泉石多古意幽期誰與論
野老抱琴去知不造王門

天師墨竹木石

清心無塵雜仙意獨已妙
娟娟歲寒姿兀兀貞靜貌
不負山中期永諧世外好
靈禽何處來日有佳音報


池臺春色

春到人間世青紅紛可喜
誰知化工妙乃寓毫素裏
花柳始妍媚池臺更清美
膝上綠綺琴洗心彈流水

堪老園為汪叔志作

先生江左望實惟龍溪後壯歲掇高科大名聞宇宙從
容佐州府善政在人口屢空吳郡獄一麾出充守衣冠
化魯儒文獻徵曲阜前史允宜修汗青書大手平生春
秋學正色班馬右清白揚祖風筆削垂不朽仕宦三十
載榮華亦何有歸來負郭居種樹樊吾園但令粗有養
寧計生理厚世事老不堪園亭堪老叟鳩杖一幅巾隨
意看花柳臨流或舒嘯孫子導前走秋風擷晚菰春雨

剪新韭宛宛雙溪水釀之可為酒翩翩敬亭雲招之可
為友飲酒對雲山先生壽同久



純白齋類稿卷三

欽定四庫全書

集部

純白齋類稿卷

四至七

詳校官編修

臣

翟槐

中書

臣

劉源溥覆勘

總校官進士

臣 繆琪

校對官中書

臣

王家賓

謄錄監生

臣

朱學濂

欽定四庫全書

純白齋類稿卷四

元 胡助 撰

五言古體

古意四首

聖世白麟見明庭丹鳳遊仁風被草木春陽煦巖幽氣
應自足致光輝非所求如何變哀泣一息三千秋山梁
貴翔集百鳥方啾啾

伯樂固知馬子期固知琴價重留一盼所貴在賞音逸

足老伏櫪雅操回人心
驪黃匪求外寧作纍下沉抱才
感知遇一軌全古今

蒼蒼松與柏清陰庇夏涼
烟凝兔絲碧露滋茯苓香高
枝巢老鶴密葉棲鳳凰
固知抱貞節不競桃李陽大哉
棟梁具歲晚凌風霜

翩翩山中雲溜溜澗下泉無心
出幽谷明鑑澄深淵一
朝炎風來人世苦憂煎雲去成
甘澤泉流潤稿田豈曰
事閒適端能致豐年

除夕

翩翩江南客復此遇除夕九街正紛華節物饒春色爆
竹聲轟轟窮鬼驚辟易千官習元會金紫光奕奕而我
獨何為寒齋守岑寂有家去如遺豈不懷內息孤燈耿
殘夜危坐拂塵席萬事窮則通明朝看新曆

送康里子淵右丞赴淞省三首

恭惟行中書江浙實云盛天子惠東南遴賢持政柄公
真廊廟具立朝色愈正丞轄固優游百司嚴法令小試

作霖手大慰蘇民病行行諒勿遲私為鄉邦慶

錢塘古都會山水清且妍出膺藩屏寄光華映貂蟬西湖了官事冠蓋傾羣賢登臨望吳越酌彼六一泉秋風怒潮生忠烈猶奮然懸知發雄抱勲業無窮年

笛響適南邁威行江海秋平生周孔學偉哉少其儔方喜瞻衣舊忽茲成別愁落落門下士終歲將淹留何如理歸檝尚及從公遊復恐非久外起作商聲謳

送胡允文楊廉夫趙彥直登第歸越

秋鶚橫江來越上得三士吾宗及楊趙聯翩鴻雁似勗
志俱妙年英華振頽靡淵源春秋學同究尊王旨明年
試南宮勢若鼎足峙桃花春浪高禹門同上矣文驚大
宗伯榮封聖天子乃知穿楊手賈勇更奇偉天門黃金
榜觀者實填委四方已傳說他郡固無比而我客京師
目擊此盛美敝廬隣越山殊重鄉邦喜三子時見過連
壁照書几瓊林燕酣罷官拜君恩侈朝紳多贈言南歸
戒行李袍笏光參差娛親耀閭里一綰會稽章叅軍錄

城市一宰天台縣絃歌好山水一佐海上州寶陀攬瑰
詭國家重設科羅才資治理圖報在忠貞豈曰榮一已
矧膺民社寄責效從此始行行慎勿遲郊迎喧老稚郡
侯宴高閣蓬萊翠如洗

雨中謝王治書作松石見贈

秋雨入毫素總是無聲詩聲確小崢嶸鬱鬱蒼髯姿下
有伏龜苓上有巢鶴枝清風古君子寫此胸中奇咫尺
千仞勢歲晚相娛嬉愧貽知己贈永與白雲期

苦雨呈治書

風雨晝如晦，淒淒撼高林。
天街似銀河，盈盈秋水深。
人馬良病涉舟楫，固可尋屋漏。
牆盡類蛙生，竈已沉城東。
念歸客獨作饑鳶吟。

東坡遊赤壁圖

赤壁忽在眼，畫史非常流。
彷彿武昌岬，山川鬱相繆。
英雄擅三國，謾說曹與周。
何如東坡老，獨駕一葉舟。
良宵天宇淨，乘興同客遊。
風清水無波，月出東山頭。
空明凌

萬頃白露沐新秋飄然若遺世從是登瀛洲舉杯笑相
屬此樂未易酬洞簫嫋餘韻江蛟舞潛幽風月亦何限
適意惟所求逝者固如斯妙理無停留借問坐中客頗
識此理否酒醒作新賦一洗萬古愁

和黃晉卿北山紀遊八首

靈源

山中念昔遊曾借僧房宿靈瀨洗幽耳孤燈懸佛屋晨
興訪隱者杖履沿澗曲

草堂

上方極清邃人世有此景
水木圍燕坐脩然吟骨冷
澗谷雲窈深何止三萬頃

三洞

洞府縣珠泉山木舞蛟翠
遊屐印蒼苔來往窺神秘
凡骨諒難仙山中空久遲

鹿田

雲深山寺幽樹石盡蒼古
行行穿蒙密衣滴松上雨
俗

駕寧少留清景忌多取

寶峰

春陰雨時作山險多沮洳魚游一泓泉藤絡千年樹偶
此會禪心坐久不能去

潛嶽

蕙帳生春寒幽棲擅雲壑巖阿有長松時見晴雪落懷
古心鬱紆清風散寥漠

山橋

書堂翳荒榛石磴攀蘿上陰崖少行蹤空谷聞樵響勿
謂古人遠千載有司賞

寶石

北山夜來雨春泉流滿路招提水石會憶我曾遊處老
衲不出山長年卧雲霧

過馮公嶺

嵯峨馮公嶺一上數十里時秋宿雨餘林壑風日美屈
曲屢登危平夷少休止山田如蟻垤縱橫翠微裏層岡

半天上絕澗深井底驛道通甌粵郵亭雲表峙斷崖懸
丹竇老樹結青樵安知無隱淪白首招不起過客戀清
勝居人厭遐詭逐逐利名心憧憧來未已

愛松軒

禪宮在空谷而有高僧居平生最所愛長松三兩株一
樹更古怪屹立當前除蒼髯似膏沐朝旭霧露餘滿地
布雲影微風奏笙竽喚醒丘壑夢好尚隱者如陰移石
橋畔流水清可娛袈裟坐其下自讀貝葉書夜久明月

出老龍吐驪珠尚想陶弘景與之談玄虛

遠碧樓

峴山入樓碧衆皺爛成堆南窓不受暑長晝薰風來坐
卧有佳趣心清寡塵埃飛翔萬翠鳳欲下吳寧臺爽氣
方掛笏白雲度崔嵬結廬傍城市愧此山林材日汲龍
井泉烹茶當銜杯閉門讀書史他年可徘徊

題王晉卿西園雅集圖

汴京文物盛想見元祐時迅掃開西園勝事春遲遲如

何貴公子雅有書畫癖休暇足蕭散羣賢會於斯曲徑
穿深竹幽花俯清池澹若忘世念稍覺山林姿堂堂眉
山公翰墨何淋漓詞源倒三峽旁觀但嗟咨從容潁濱
老緩帶相追隨或據案凝望或曳杖委蛇松陰羅古器
時復斟酌之漱井坐晚涼得句秀且竒道人方摘阮淮
海音獨知石屏峭崖立揮毫者為誰豫章學空寂危叅
方外師茶烟落花畔禪榻鬢成絲徜徉各有適造物非
吾私諒能燭茲理浩然無所疑龍眠精繪事展卷有餘

思我已後諸公三歎題此詩

李成江山風雨圖

李成善山水神妙詣其極想當盤礴時天地俱動色急
揮不停手工與造化敵九天風雨來千峰雲樹黑老樹
吹欲倒前村已相失勢若萬馬奔淋漓元氣濕草堂茅
盡捲詩老四壁立但聞溪上聲那見林間翼片帆欲何
往搖蕩正危急誰卧百尺樓奇觀不下席豈無隱居者
惟憂沒釣石亦有山寺僧沾灑出禪寂無窮貌幽險千

里歸咫尺吁嗟畫中見長年愧行役

史顯甫左丞小車行春圖

遠山秀如黛朝來雨初晴平原既膏沐桃李亦已榮
春風足行樂禽鳥方和鳴有懷杜陵興里社尋舊盟
散蔬雜山野提攜雙玉瓶整釋廊廟具幅巾一身輕
小車過花間隱隱疑有聲兒童拄杖履老父相邀迎
班荆坐林麓香醪時一傾勝處即小留望遠贈雙明
廓然天地大適見萬物情

水木清華亭二首

高人種松桂結屋居其間蒼苔無轍迹流水自潺湲高
樹棲青鳥幽池照白鵬有時撫絲桐有時持釣竿暮看
林月上朝與野雲閑豈無經世心白首不出山

微風行水面初旭散林影魚潛水益深鳥弄林逾靜魚
鳥悅清華山人心悟領嗟彼高蓋憂何如事幽屏採藥
春雲煖歸樵烟逕暝庭草日日積柴門無造請

王公儼少監雲松巢

飄飄謫仙氣神交契杳冥厭彼承明直駕言卜林垆廬
山曉看瀑洞庭暮揚舲雲來長松白雲去長松青結巢
雲松間服食千歲苓眼高空四海澹泊遺世情月出漱
寒瀨哦詩走山精

九日會晉卿同鄉友小飲既而往飲晉卿所

佳節莫虛擲黃花開滿枝約我鄉中友薄言飲一卮亦
有西江客邂逅同襟期小窻媚秋色獻酬螯可持醉來
興未已借馬俱北馳從容博士席盤饌羅珍竒采石風

味高笑談益淋漓西望搔白髮青山沒斜暉出門日云
夕微月光在衣醕酊復醕酊相攜徒步歸

客居冬懷十首

冬日莫嫌短南窓無限明兀坐觀古書翛然遺世情好
句有時得興來自天成

好官貴盛年好人貴晚節六十白頭翁歸懷胡不切世
道苦迂迴我心良直截

食攬苦已極寧覺微甘回養生宜飲醇竟日恥空罍潛

蟄需陽動地爐畫寒灰

大風連日夕萬樹吹盡禿前塵似揚波後塵如轉軸吁
嗟形勢途正是勞馬足

清晨門未啓野衲來諷經須臾童子集曉曉背書聲何
當返吾廬逸老靜無營

良友居我隣或在巷南北日靜風不起縱步時相覓把
酒細論文一笑百憂息

詩豈解窮人人窮詩自工今我以身試苦吟髮如蓬老

來益固守窮達付天公

日光上窓紙愛眠常起晏近午不出門春米始朝飯安閒息妄想貧苦今已慣

旅困依僮僕痛痒切吾身交情少金石病患疇相親珍重遠方客起居慎風塵

我臞真鶴形固非食肉相寓京又三冬未悟平生妄白髮還故山笋蕨春可餉

蒼雪軒

蕭然蒼雪軒窗外萬竿竹夏陰禪榻冷翠霧沾衣綠清
風畫說法白雲夜同宿何以充朝飢呼童饌寒玉食飽
漱石泉林間自捫腹

留雲軒

白雲從何來就此石牀宿有意棲長松無心出空谷挽
之不容去庶用媚幽獨爽氣潤絲桐寒光凝竹屋盡日
山中留成堆封封古木長伴老僧閒野田春雨足

純白齋類稿卷四

欽定四庫全書

純白齋類稿卷五

元 胡助 撰

七言古體

松柏歲寒圖歌

畫師不畫洛花妖豔萬枝紅却畫峨嵋嶺上一長松又不畫孤山橫斜千點白却畫孔明廟前一古柏長松古柏成大材萬牛之力挽不回懸知勁節飽霜雪石根猶帶晉莓苔直幹亭亭聳蒼翠雙頂團團狀車蓋世誇桃

李春風顏不識虬龍後凋態分明西山兩餓夫化作松
柏千年臞韋侯老筆絕代無我得此畫勝得驪龍珠摩
挲病眼看入妙似聞蕭瑟清風餘掛之書齋興不孤歲
寒人對歲寒圖

吊臙脂井闌歌二首

二南本風化鄭衛多淫辭聖人刪詩亦見錄乃知監戒
良在茲江南日夕窮歡宴玉樹花新月長滿龍驤飛渡
天塹平屋茅不直秋風捲門前狎客散如烟井底嬌娥

共攀緣當時香淚灑闌石千秋化作胭脂色幾人摩挲
長歎息娟娟猶暎土花碧劉郎曾入桃源中嗔花不似
胭脂紅桃花流水今安在霜風淒其石可碎石可碎無
奈何醜汙青史不可磨

綺牕美人酣未醒催汲清泉飛兩綆水晶簾空秋月明
井梧露滴銀牀冷後庭花謝知幾秋淚痕猶帶當年愁
天長地久何嗟及殷紅點點爛不收夜雨鳴蛩更淒楚
古堞雲荒宮樹死覆車長使後人哀胭脂零落歸黃土

剛腸疾惡寧在茲石應有語無人知雀臺亦是貯歌舞
古瓦何傷成硯池

清涼寺

城中車馬塵及腹城外山林春翳木二三佳士同我遊
到處登臨訪遺躅石頭巖巖蹲老虎古寺清涼滿修竹
六朝形勝幾人爭忽忽興亡互歌哭寒潮無復打空城
八百年來變陵谷南唐避暑翠微亭荊棘叢生走麋鹿
躋攀絕頂何所見江北青山來不速晉宋諸賢安在哉

唯有年年春草綠富貴何如一杯酒斷碑零落無人讀
須臾客去僧掩關颯颯山風動寒玉

梅花吟

乾坤清氣鍾梅花品題不盡騷人家剛道橫枝有南北
風姿香韻無等差南枝向陽開獨早北枝向陰尚枯槁
陽和走上北枝來北枝開勝南枝好一樹自分南北枝
年來冷暖無人知珠簾翠幙要調護畫闌玉笛休輕吹
君不見春深千樹花如雪南北枝頭孰分別

續太古雪歌

為楊友直作

君不見金華山中牧羊子叱石為羊石皆起又不見神
山開時石髓流剛風吹合如琳球君家古雪亦其匹晴
虹貫窻練光濕傍人驚嗟見尤物俗眼那知是仙質子
雲齋中有岷峨彷彿太白連蓬婆雪耶石耶竟莫辨但
覺芒寒銀海眩陵陽老人歌楚章吳興趙書鸞鳳翔要
與此石相頡頏人間三絕誰其當看來自是洪濛太素
光仇池雪浪安敢鴻雁行不知閱世幾萬古蓬萊清淺

凋扶桑拂拭三扣春風香請君貢之白玉堂

題范文正公書伯夷頌

翰墨嘗託文章傳文章益重節義全使無節義照今古
文章翰墨空婣娟特立獨行不顧衆萬世標準權亦用
吏部雄文破鬼膽為渠喚醒西山夢范公相望餘千年
人物自與臯夔并黃素細書伯夷頌白頭不草太玄經
一字千金價無讓虹光夜徹星斗上夷清韓頌高平書
再拜莫作文翰想奸臣襲藏尤畏仰面無生色泚流顙

珠還璠復子孫賢我信斯文天未喪佳辭善書常有餘
嗚呼節義不可一日無

周權府墨竹

將軍絳侯之子孫千年世胄仍雲屯
竭來出戍東陽郡
時平盜弭無工文
雙溪清氣青冥翅
回首人間如夢寐
耆年在泮非吾志
斯文有續曾未墜
幅巾野服逍遙地
百年種德當平治
明經射策復古制
一郎高攀廣寒桂
異代科名父兄繼
光動邦基昌永世
寵錫貤恩泉壤賁

天之報善以子貴
煮蒿悽愴孝思至
春秋備物大夫祭
遺像儼然後人對
曉山我我千古翠

黃河行

黃河之水貫九州
發源西自崑崙丘
渾渾深大江海勢
浩浩迅駛東南流
厥初疏鑿導末派
想見浮泛窮荒幽
狂瀾滔空或鯨駕
先民幾度為魚憂
萬古不平呂梁險
老天永畀行旅愁
人生固非金石壽
一清可待踰千秋
泝沿北上聊濯足
欲照白髮知無由
維舟彭城古岸下

慨然興感登黃樓千載英雄春夢破一朝富貴秋雲浮
眼明遺文尚可讀斂衽前輩清風修向來河清美金頌
豈知乃徽今日休冠帶充朝文物盛桑麻蔽野人烟稠
太平一統古未有觀光萬里今重遊快哉風帆日行遠
不將機事驚沙鷗丈夫出處自有志安得局束山中留

塵外亭

結亭幽處車馬寂流水泠泠山更碧白雲滿地紫芝老
修木繁陰清暑夕巖阿挂枝風露濃澗底梅花冰雪積

山間四時靡不好世上纖塵那得入誰將圖本到京邑
中朝名士見之空歎息

苦熱行

去年六月苦淫雨日夕蕭蕭不知暑今年亢旱連六月
烈燄飛埃人病暍誰道朔方冰雪多年來無奈炎蒸何
火雲亭午驕閃閃燕馬亦作吳牛喘安得甘霖萬物蘇
扁舟南歸浮五湖

青青柏一首壽王治書

青青柏挺孤直秀映中華
叅北極儀表高臺陰四垂
商聲瑟瑟凝秋碧香葉交
柯鸞鳳巢蒼烏朝集求其
曹勁氣森嚴醜怪伏百鳥
不敢妄鳴號清風時來似
流水九霄雨露翠如洗上
有光芒老人星持書一卷
長生經後千齡柏青青

題治書所贈松柏石

高人在昔例能畫不比俗
流空索價偶然盤礴得新
意落筆豈在宏偃下拂拭
絹素生秋色為誰作此好
松石

一株翠柏飽風霜我益敬之古遺直獨行犖确山徑中
衣冠似是商山翁心期綿邈贈歸客中有歲寒千古風

和歐陽承旨韻題金坡圖

臨江山水冠江右洞府人仙日清暇金坡玉筍更逍遙
道德黃庭幾回寫昔聞煉修多真逸避秦人隱雲林下
四時瑤草長是春百丈飛泉不知夏尚方真人試寶墨
圖成秀色照山埜是間有路通桃源流水紅芳自容冶
卧雲耳孫袁道士袖拂烟霞絕瀟灑琳宮別館隔塵世

白日青松最幽雅勝地胡為不歸去征途誰是長年者
樓居高詠翰林詩金坡回首懷金馬

上京獨石歌

出自居庸北口關千山萬山蒼石岩龍門瑰詭莫敢扳
他山瑣碎不足觀此石胡為名以獨魁然特起違林谷
堅頑未必中韞玉夜疑伏虎空飛鏃安得煉之補天漏
徒使千秋擎佛屋

灤河曲

行人驅車上灤河灤河水淺人易過北入太液流恩波
潤澤九州民物和天子清暑宮戢戢兩都日騎如飛梭
穹廬畜牧草連坡青鸞白雁秋風多勸君馬酒朱顏酡
試聽一曲敕勒歌

再賦李陵臺

李陵臺畔秋雲黃沙平草軟肥牛羊當時不是漢家地
全軀孑戢寧思鄉塞垣西北逾萬里此去中原良邇止
安得有臺灤水側好事千古空相傳可憐歸期典屬國

雪裏幽窖無人識

秋夜長

秋夜長月微茫七月已似十月涼風傳禁柝車馬靜沙
際檀廬燈火光夢回酒醒衾絮薄不知此身在灤陽羣
雁飛鳴向南去問君何時還故鄉

龍門行

龍門山險馬難越龍門水深馬難涉矧當六月雷雨盛
洪流浩蕩漂車轍我行不敢過其下引睇雄奇心悸懾

歸途却喜秋泥乾
颯颯山風吹帽寒
溪流曲折清可鑑
萬丈蒼崖立馬看

空閨詞

綺牕鎖春朱戶
局雲和廢久
塵冥冥空有翠被淒餘馨
向來行跡莓苔青
返魂香消夜寥聞
乘鸞一去無消息
無消息淚沾臆
楚水吳山愁裏碧
悵然起望
壁月斜曉
風吹盡櫻桃花

三禽言

泥滑滑泥滑滑江南路長烟水濶雲黑山昏雨又来行
人深窘嫵爾聒休云蜀道費躋攀只今平地亦行難
脫袴脫袴勸我聲聲淚如雨富人脫故還著新號寒孰
恤貧人苦輸官未了償私逋舊袴欲脫新袴無
不如歸去落花滿地催得春歸不自歸啼血年年訴何
事蜀山萬木好棲身何必江南愁殺人

純白齋類稿卷五